



册府元龜
卷之八百六十六
至六十八



43
849
282



門 1 3
849
282



冊府元龜

淮南李嗣京叅閱

西極文翔鳳訂正

豫章黃國琦較釋

總錄部

貴盛

夫貴者人心之所欲爵者天下之達尊苟富貴之來
固必有甚盛者矣乃有勲績隆茂忠規篤厚遭遇時
運因緣戚里繇至行而積慶用儒術而起家以至父
子同封昆弟並竇榮戟駢列陞組交映持衡擁旄者

冊府元龜 總錄部

卷之八百六十六

數人鐘鳴鼎食者累世非夫守泰盛之戒懷招損之懼寵而思降滿而不溢者孰克保世而善終乎哉

秦蒙恬大父驚事昭王至上卿父武爲秦裨將軍恬爲內史將三十萬衆北逐戎狄威振匈奴始皇甚尊寵蒙氏信任賢之而親近恬弟毅至上卿出則參乘入則御前恬任外事而毅嘗爲內謀名爲忠信故雖諸將相莫敢與之爭焉

李斯楚上蔡人也爲秦丞相斯長男繇爲三川守諸男皆尚秦公主女悉嫁秦諸公子三川守告歸咸陽李斯置酒於家百官長皆前爲壽門庭車騎以千數

李斯喟然而嘆曰嗟乎吾聞之荀卿曰物禁太盛夫斯乃上蔡布衣閭巷之黔首上不知其駕下遂擢至此當今人臣之位無居臣上者可謂富貴極矣物極則衰吾未知所稅駕也

漢石奮爲諸侯相四子官至二千石於是景帝曰石君及四子皆二千石人臣尊寵乃舉集其門凡號奮爲萬石君

鄭當時爲大司農昆弟以當時故至二千石者六七人

公孫賀爲丞相賀子敬聲代賀爲太僕父子並居公

卿位

楊惲丞相敞子為諸吏光祿勳惲家方全盛時乘朱輪者十人

司馬安四至九卿昆弟以安故同時至二千石十人
霍光驃騎將軍去病弟也為大將軍封博陸侯自昭
帝時光子禹及兄弟雲皆中郎將雲弟山奉車都尉
侍中領胡越兵光兩家壻為東西宮衛尉兄弟諸壻
外孫皆奉朝請為諸曹大夫騎都尉給事中宣帝時
光薨拜禹為左將軍嗣博陸侯封山為樂平侯以奉
車都尉領尚書事封雲為冠陽侯

張安世父湯為御史大夫安世後為大司馬車騎將
軍領尚書事封富平侯子延壽為左曹太僕安世兄
賀無子安世小子彭祖宣帝封彭祖為陽都侯又封
賀孤孫霸為關內侯安世以父封侯在位太盛及辭
祿詔都內別藏張安世無名錢以百萬數都內內藏官
也安世以還
官官不
簿也安世孫臨尚敬武公主安世子孫相繼自宣
元以來為侍中中書侍諸曹散騎列校尉者凡十餘
人功臣之世子有金氏張氏親近寵貴比於外戚
金日磾為光祿大夫封秬侯日磾兩子賞建俱侍中
與昭帝畧同年共卧起賞為奉車建駙馬都尉日磾

弟倫為黃門侍郎早卒倫後嗣盛子安上為建章衛尉封為都成侯安上四子嘗敞岑明岑明皆為諸曹中郎將嘗光祿大夫敞衛尉敞死成帝拜敞子左曹涉為侍中使待幸祿車載送衛尉舍幸祿車當直右以待召載皇孫涉為侍中使待幸祿車載送衛尉舍今遣涉歸以皇孫車載之以示寵之漢注祿車名皇孫車涉弟參哀帝時為東海太守參弟饒越騎校尉涉兩子湯融皆侍中諸曹將大夫將亦謂中郎將也涉之從父弟欽為大中大夫給事中欽從父弟遷為尚書令兄弟用事欽後封都成侯欽弟遵封侯歷九卿位日磾傳國後嗣七世內侍何其盛也

嚴延年東海人為河南尹延年兄弟五人皆有吏材

至大官東海號延年母曰萬石嚴嫗

一門五二千石故總為萬石

辛慶忌為左將軍長子通為護羌校尉中子遵函谷關都尉少子茂水衡都尉出為郡守皆有將帥之風宗族支屬至二千石一十餘人

馮揚宣帝時為弘農太守有八子皆為二千石趙魏間榮之號曰萬石君

杜延年御史大夫周子也延年後為御史大夫封建平侯延年薨子綏嗣綏六弟五人至大官少弟熊歷五郡二千石三州牧刺史有能名惟中弟欽官不至

而最知名欽子及昆弟支屬至二千石者且十人
韋賢子玄成並丞相宗族至二千石者十餘人

史丹有子男女二十人九男皆以丹任並爲侍中諸
曹親近在左右史氏凡四人侯至卿大夫二千石者
十餘人皆訖王莽乃絕

王禁元后父也封陽平侯禁子鳳嗣侯崇安成侯譚
平阿侯商成都侯立紅陽侯逢時高平侯根曲陽侯
音安陽侯莽新都侯譚商立逢時根五人同日封謂
之五侯榮貴絕代王家凡十侯五大司馬外戚莫盛

後漢竇融扶風人更始初爲張掖屬國都尉光武建
武八年封融爲安豐侯弟友爲顯親侯及隴蜀平詔
融與五郡太守奏事京師官屬賓客相隨駕乘千餘
兩馬牛羊被野融到詣雒陽城門上涼州牧張掖屬
國都尉安豐侯印綬詔遣使者還侯印綬引見就諸
侯位賞賜恩寵傾動京師又加特進代陰興行衛尉
事特進如故又兼領將作大匠弟友爲城門較尉兄
弟並典禁兵融長子穆尚內王公主代友爲城門較
尉穆子勳尚東海恭王彊女泚陽公主友子固亦尚
光武女涅陽公主顯宗卽位以融從兄子林爲護羗

較尉竇氏一公兩侯三公主四二千石皆相與並時
自祖及孫官府邸第相望京邑奴婢以千數於親戚
功臣中莫與爲比

鄧禹封高密侯爲太傅永平元年薨明帝分禹封三
國長子震爲高密侯襲爲昌安侯珍爲夷安侯禹少
子鴻爲度遼將軍行車騎將軍震子乾尙明帝女沁
水公主乾孫褒尙安帝妹舞陰公主襲子藩亦尙明
帝女平臯長公主禹第六子訓爲張掖太守護羗較
尉訓子騰車騎將軍儀同三司惺虎賁中郎將弘聞
皆侍中騰封上蔡侯惺葉侯弘西平侯聞西華侯食

邑各萬戶鄧氏自中興後累世寵貴凡侯者二十九
人公二人大將軍以下十三人中二千石十四人列
較二十二人州牧郡守四十八人其餘侍中將大夫
郎謁者不可勝數東京莫與爲比

耿况封牟平侯子弇封好畤侯爲建威大將軍况病
弇兄弟六人皆垂青紫省侍醫藥當代以爲榮耿氏
自中興已後迄建安之末大將軍二人將軍九人卿
十三人尙公主三人列侯十九人中郎將護羗較尉
及刺史二千石數十百人

馬援三兄况余員並有才能王莽時皆爲二千石况

河南太守余中壘較尉負增山連率後援為伏波將軍授子廖章帝初為衛尉封順陽侯子豫為步兵較尉廖弟防為車騎將軍城門較尉防貴寵最盛於九卿絕席防弟光為執金吾防兄弟貴盛賓客奔奏後光為太僕子康為侍中援兄子嚴章帝初為御史中丞子鱣為郎

魯恭為司徒建武十五年從巡狩南陽除子撫為郎中賜駙馬從駕時弟丕亦為侍中兄弟父子並列朝廷恭世吏二千石

鄧晨字律卿南陽新野人也世吏二千石

東觀漢記曰晨曾祖

父隆揚州刺史祖父勳交阯刺史

何敞扶風人其先修生成為漢膠東相成生果為大中大夫果生比工為丹陽侯比平生壽蜀郡太守壽生顯京輔都尉顯生鄢光祿大夫鄢生寵濟南都尉寵生敞為汝南太守敞為五官中郎將

趙典為長樂少府衛尉父戒為太尉兄子謙謙弟温相繼為三公

宗資為南陽太守家代為漢將相名臣

羊續字興祖為南陽太守其先七世二千石卿較祖父侵安帝時司隸較尉

歌純爲東郡太守純宗族封列侯者四人關內侯者三人爲二千石者九人

法雄齊襄王法章之後爲南郡太守宣帝時徙三輔世爲二千石

秦彭自漢興之後世位相承六世祖襲爲潁川太守與羣從同時爲二千石者五人故三輔號曰萬石秦氏彭亦終潁川太守

蓋勳爲潁川太守勳家世二千石曾祖父進漢陽太守祖父彪大司農父字思齊官至安定屬國都尉

郭禧靈帝建寧二年爲太尉禧子鴻至司隸較尉封

城安鄉侯郭氏自弘後數世皆傳法律子孫至公者一人廷尉七人侯者三人刺史二千石侍中郎將者二十餘人侍御史正監平者甚衆

應順爲將作大匠子疊江夏太守疊生彬武陵太守彬生奉從事中郎奉生邵車騎將軍掾邵弟珣司空掾珣子瑒曹操辟爲丞相掾順至瑒七世通顯瑒弟璩侍中自漢至魏軒冕相襲爲郡盛族璩子貞音散騎嘗侍貞弟子詹鎮南大將軍江州刺史

李章字第公河內懷人也五世二千石

尹勳家世衣冠伯父睦爲司徒兄頌爲大尉宗族多

居貴位者而勲獨持清操不以地勢尚人
孔昱七世祖霸成帝時歷九卿封褒成侯自霸至昱
爵位相係其卿相牧守五十三人列侯七人
周燕汝南人爲郡吏曹太守杜殺人燕代受罪不食
而死有五子皆至刺史太守

魏夏侯惇爲大將軍封高安鄉侯惇卒子玄嗣文帝
追思惇功欲使子孫畢侯分惇邑千戶賜惇七子二
孫爵皆關內侯惇弟廉及惇中子楷素自封列侯惇
從弟淵爲征西將軍封博昌亭侯弟淵妻太祖內妹
長子衛尚太祖弟女封安寧亭侯黃初中賜淵中子

霸太和中賜霸四弟爵皆關內侯霸弟威官至兖州
刺史威弟惠樂安太守惠弟和河南尹威子駿并州
刺史次莊淮南太守莊子湛以才博文章至南陽相
散騎嘗侍莊晉氏陽皇后姊夫也繇此一門後盛於
時

陳紀爲鴻臚紀子羣爲司空羣子泰爲尚書左僕射
紀弟湛孫佐官至青州刺史佐弟坦爲廷尉佐子準
爲太尉封廣陵郡公準弟戴徵及從弟堪並至大位
準孫達字林道有譽江左爲西中郎將追贈衛將軍
王凌爲征東將軍假節都督揚州諸軍事是時凌外

甥令狐愚以才能爲交州刺史屯平阿舅甥並與兵專淮南之重

劉邠本名炎犯晉太祖諱改爲邠位至太僕子粹字純嘏侍中次宏字終嘏太嘗次漢字冲嘏光祿大夫清冲有貴識名亞樂廣宏子咸徐州刺史次耽晉陵太守耽子悛字真長尹丹陽爲中興名士也

吳士燮爲交阯太守見弟並爲列郡雄長一州備在萬里威尊無上出人鳴鐘磬備具威儀箱簫鼓吹車騎滿道胡人夾轂焚燒香者嘗有數十妻妾乘輜輪子弟從兵騎當時貴重震服百蠻尉他不足踰也

周瑜爲備將軍兩男一女女配太子登男循尚公主拜騎都尉有瑜風早卒循弟胤初拜興業都尉妻以宗女授兵千人屯公安黃龍元年封都鄉侯諸葛瑾爲大將軍而弟亮爲蜀丞相二子恪融皆與戎馬督領將帥族弟誕又顯名於魏一門三方爲冠蓋天下祭之

晉庾嶷爲太僕潁川人子霽字玄默尚書陽翟子嶷弟遁字德先太中大夫遁裔嗣克昌爲世盛門侍中駿河南尹純皆遁之子豫州牧長史歆遁之孫太尉文康公亮司空冰皆遁之曾孫貴達至今

楊文宗武元皇后父也其先仕漢四世爲三公文宗爲魏通事郎襲封荔亭侯

阮籍兄子咸咸子瞻瞻弟孚咸從子修孚族弟放放弟裕裕子儻寧普儻早卒寧鄱陽太守普驃騎諮議叅軍儻子歆之中領軍寧子暎秘書監暎弟萬齡及歆之子彌之元熙中並列顯位

周札爲右將軍會稽內史時札兄靖子懋晉陵太守靖流亭侯懋弟建征虜將軍吳興內史建弟贊大將軍從事中郎武康縣侯贊弟縉太子文學都鄉侯次兄子颯臨淮太守烏程公札一門五侯並居列位吳

士貴盛莫與此比

范平吳郡人仕吳爲臨海太守三子爽咸泉並以儒學至大官泉子蔚關內侯

毛寶爲征虜將軍豫州刺史至孫曠三葉擁旄開國者四人將帥之家與尋陽周氏爲輩而人物不及也王坦之湛之曾孫也爲中書令徐兗二州刺史子愷字茂仁愉字茂和並少踐清階愷襲父爵愉稍遷驃騎司馬加輔國將軍愷太元末爲侍中領右衛將軍多所獻替兄弟貴盛當時莫比愉子綏先是湛之父昶爲魏司空昶之父澤爲漢鴈門太守已有名稱忱

亦坦之子又秀出綏亦著稱八葉繼軌軒冕莫與爲比焉

宋朱齡石字伯倪沛郡沛人也家世將帥祖騰建威將軍吳國內史伯父憲及斌並爲西中郎元真將佐憲爲梁國內史斌爲汝南內史

何尚之爲左光祿開府侍中領中書令子邵尚太祖第十六女南郡公主女適彭城王義康巴陵哀王休若

周嶠尚高祖第四女宣成德公主二女適建平王宏廬江王祿以貴戚顯官

南齊褚淵尚宋巴西公主弟澄父湛之尚始安公主薨納側室郭氏生淵後尚吳郡公主生澄淵事主孝謹主愛之湛之亡主表淵爲嫡澄尚宋文帝女廬江公主拜駙馬都尉歷官清顯淵位侍中司徒錄尚書事

劉俊爲五兵尚書歷朝皆見恩遇太祖爲鄱陽王鏘納俊妹爲妃高宗又爲晉安王寶義納俊女爲妃自是連姻帝室

王慈爲冠軍將軍司徒左長史慈妻劉秉女子觀尚世子長女吳縣公主主修婦禮姑未嘗交答江夏王

鋒爲南徐州妃慈女也

王績爲太嘗女適安陸王子敬世祖寵子永明三年
納妃修外舅姑之禮世祖遣文惠太子相隨往績家
置酒設樂公卿皆冠冕而至當世榮之

王玄載爲平北將軍交州刺史弟玄邈爲持節都督
南秦二州軍事征虜將軍西戎校尉梁南秦二州刺
史兄弟同時爲方伯

王融字元長爲中書郎祖僧達中書令曾高並台輔
梁明僧紹位至貴州刺史僧紹子山賓北兖州刺史
山賓弟少遐又拜青州刺史明氏南度雖晚並有名

位自宋至梁爲刺史者六人

陳歐陽頴長沙臨湘人也爲廣州刺史征南將軍時
頴弟盛爲交州刺史弟遂爲衡州刺史合州顯貴名
振南土

魯廣達吳州刺史悉達弟也時江表將帥各領部曲
動以千數而魯氏猶多廣達後至中領軍

王冲爲左僕射加特進左光祿大夫領丹陽尹有子
三十人並致通官

後魏長孫道生太武時爲司空侍中與從父嵩俱爲
三公當世以爲榮

尉諾世祖時爲幽州刺史兄太真爲湘州刺史古真爲定州刺史諾兄弟並爲方伯當世榮之

于栗磾爲豫州刺史封新安公卒贈太尉子雒拔爲侍中尚書令卒官維拔六子長子烈爲領軍卒贈太尉烈子忠爲侍中薨贈司空烈弟果歷朔華并嘗四州刺史果弟勁位沃野鎮將爵富昌子宣武納其女爲皇后封勁太原郡公後爲征北將軍定州刺史卒贈司空自栗磾至勁累世貴盛一皇后四贈公三領軍二尚書令三開國公

封懿初爲慕容寶中書令兄孚爲太尉懿雋偉有才

氣能屬文與孚雖器行有長短然各位畧齊

盧道裕尙獻文女樂浪長公主弟道虔尙孝文女齊南長公主外甥李彧尙莊帝女豐亭公主一門三主當世以爲榮

李冲顯貴門族榮盛六姻兄弟子姪皆有爵官一家歲祿萬疋有餘

王肅父與南齊雍州刺史與及兄弟並爲齊武帝所殺肅自建鄴來奔尙陳留長公主肅前妻謝生子紹及二女肅臨薨謝始携二女及紹至壽春宣武納其女爲夫人孝明又納紹女爲嬪紹位中書侍郎

羅延居地侯結玄孫獻文帝天安中爲驃騎將軍左
先祿大夫結從子渥渥子提並歷通顯

北齊斛律金爲太師左丞相長子光大將軍次子羨
及孫武都並開府儀同三司出鎮方嶽其餘子孫皆
封侯貴達一門一皇后二太子妃三公主尊寵之盛
當時莫比

白建歷特進侍中中書令諸子幼稚俱爲州郡主簿
新君選補必先召辟男婚女嫁皆得勝流當時以爲
榮寵之極

楊愔爲神武行臺右丞表解職還塋一門之內贈太
師太傅丞相大將軍者二人太尉錄尚書及中書令
者三人僕射尚書者五人刺史太守者二十餘人追
祭之盛古今未之有也及喪柩進發吉凶儀衛直二
十餘里會塋者將萬人

後周獨孤信爲太保大宗伯信長女周明敬后第四
女唐元貞皇后第七女隋文獻皇后三代皆爲外戚
自古以來未之有也

隋鄭譯字正義滎陽開封人也祖瓊魏太嘗父道邕
魏司空譯周武帝時起家給事中拜銀青光祿大夫
轉左侍中與儀同劉納嘗侍帝側

竇熾開皇初拜太傅贊拜不名熾事親孝奉諸兄以
悌順聞及其位望隆重而子孫皆處列位遂爲當時
盛族

李穆仕周以軍功爲武備將軍領侍中開府太祖封
穆姊妹皆爲郡縣君開皇初拜太師真食成安縣三
千戶於是穆子孫雖在襁褓悉拜儀同其一門執象
笏者百餘人穆之貴盛當時無比

于義字慈恭在周時破王謙超拜上柱國時義兄翼
爲太尉弟智兄子仲文並上柱國大將軍已上十餘
人稱爲貴盛

楊素爲左僕射貴寵日隆其弟約從父文思弟紀及
族父昇並尚書列卿諸子無汗馬之勞位至柱國刺
史親戚故吏布列清顯素之貴盛近古未聞素子玄
感以軍功位至柱國與其父俱爲第二品朝會則會
列其後高祖命玄感降一等玄感拜謝曰不意陛下
寵臣之甚許以公庭獲展私敬

乞伏慧爲太僕卿封宜民郡王其兄貴和又以軍功
爲王一門二王稱爲貴顯

賀若弼爲右武侯大將軍弼時貴盛位望隆重其兄
隆爲武都郡公弟東爲萬榮郡公並刺史列將弼家

珍玩不可勝計婢妾曳綺羅者數百人時人榮之
唐房玄齡爲尚書左僕射封魏國公監修國史居端
揆十五年女爲韓王妃男遺愛尚高陽公主頻表辭
位優詔不許

高士廉祖岳齊清河王尚書令太保父勵齊樂安王
尚書右僕射隋洮州刺史士廉文德皇后之舅官至
尚書左僕射封申國公

竇威隋太傅熾子也大穆皇后從父兄武德初爲內
史令高祖嘗謂曰昔周朝有八柱國之貴吾與公家
戚登此職威曰家昔在漢朝再爲外戚於後魏三處

外家陛下龍興復出皇后臣又階緣戚里位忝鳳池
自惟叨濫曉夕兢懼高祖笑曰比見關東人與雀盧
爲婚猶自矜伐公代爲貴戚不以貴乎威子憚爲岐
州刺史兄子軌官至雒州都督軌子奉節尚高祖永
嘉公主執弟宗爲右領軍大將軍

竇抗太穆后從父兄隋雒州總管陳國公榮子也母
隋文帝萬安公主隋爲幽州總管武德初爲左武侯
大將軍從平王世充冊勳太廟者九人抗與從弟軌
俱預朝廷榮之子術爲左武衛將軍次子靜爲民部
尚書靜子達尚太宗女遂安公主靜弟誕尚高祖女

襄陽公主爲宗正卿誕子孝慈衛將軍孝慈子希珍
爲禮部尚書太子少傅誕少子孝謹女昭成皇后也
子希臧太子少傅幽國公希球太子賓客異國公希
瓘後名瓊畢國公開府儀同三司玄宗早失太后尤
重外家瓊兄弟三人皆國公食實封瓊子又尚玄宗
女昌樂公主竇氏自武德再爲外戚一品三人三品
已上三十餘人尚主者八人女爲王妃六人唐世貴
盛莫與爲比

楊恭仁爲雒州都督弟師道尚桂陽公主從姪女爲
巢刺王妃弟子思尚安平公主連姻帝室益見崇重

自武德之後恭仁名位猶盛則天時又以外戚崇寵
一家之內駙馬三人王妃五人贈皇后一人三品已
上官二十餘人遂爲盛族

郝處俊高宗儀鳳中爲侍中時侍中許圜師郎處俊
之舅早同州里俱宦達於時又其鄉人田氏彭氏以
殖貨見稱故江淮間爲之語曰貴如許郝富如田彭
來嘗高宗朝爲黃門侍郎同中書門下三品侍中濟
之異母兄也兄弟相次知政事時以爲榮

張延師爲左衛大將軍延與兄太僕卿太師及次兄
儉同時三品宅中棨戟齊列時人榮之號爲三戟張

家

張文瓘高宗朝為侍中四子潛沛洽涉後皆至三品時人謂之萬石張家

傅遊藝為鸞臺侍郎同平章事兄神童為冬官尚書兄弟並承榮寵

張嘉貞玄宗時為中書令帝以嘉貞弟嘉祐為金吾將軍兄弟並居將相之位

韋安石神龍中為中書令高祖孝寬周太傅曾祖津隋民部尚書武德初歸於皇朝授黃門侍郎封武陽郡公主至安石歷仕三朝台輔安石子斌天寶中為

三品斌兄陟為河東大守兄由為石金吾將軍縉為少師四人同時列戟天下榮之安石從祖兄子巨源及文昌右相待價並是五服之親自餘近屬至大官者數十人

韋嗣立長壽中代兄承慶為鳳閣舍人長安三年承慶代嗣立為天官侍郎頃之又代嗣立知政事及承慶卒嗣立又代為黃門侍郎前後四職相代又父子三人皆至宰相有唐已來莫與為此

崔義玄為御史大夫蒲州刺史子神基司賓卿同鳳閣鸞臺平章事神基弟神慶歷司刑司禮二卿神慶

子琳等皆至大官羣從數十人趨奏省闕每歲時家宴組佩輝映以一榻置笏重疊於其上開元天寶間中外族屬無總麻之喪其福履昌盛如此東都司第門琳與弟太子詹事珪光祿卿瑤俱列祭戟時號三戟崔家琳位終太子少保

季嶠爲鸞臺侍郎平章事兼修國史久視元年嶠舅天官侍郎張錫入知政事嶠轉成均祭酒罷知政事及修史甥舅相繼在相位時人榮之

韋堅爲緡雲郡太守姊爲薛王妃堅又娶姜皎女爲妻堅妹又爲太子妃姻戚榮盛當時無比

李峴至德中爲京兆尹兼御史大夫李峴兄暉爲戶部尚書兼成都尹乾元初玄宗還京暉自蜀至又兼御史大夫兄弟俱判臺事自國初以來兄弟並拜大夫未有其比時長安士庶皆賦詩美之

郭子儀爲尚父兼太尉中書令汾陽郡王有子八人壻七人皆重官子曖尚昇平公主諸孫數十人每羣孫問安不盡識領之而已子儀麾下將若李懷光輩數十人皆王侯貴重子儀願指進退如僕隸幕府之盛近代無比子儀歲入官俸二十四萬貫私利不在焉其宅在親仁里居其地四分之一中通永巷家人

三十指出入者不知其居前後賜良田美器名園甲
館聲色珍好堆積羨溢不可勝紀代宗不名呼為大
臣天下以其身存亡為安危者殆二十年較中書令
考二十有四權傾天下而朝不忌功蓋一代而主不
疑後窮人欲而君子不罪富貴壽考繁衍安泰哀榮
終始人道之盛無缺焉

李愿中書令晟之子晟立大勲諸子猶無官宰相奏
陳德宗即日召愿拜銀青光祿大夫太子賓客上柱
國舊制勲臣上柱國賜戟即令賜愿乃與父並列於
門

劉從一德宗朝為相中書侍郎林甫之玄孫禮部侍
郎令植之孫也初林甫生祥道麟德初為右相祥道
即從一曾伯祖也令植從父兄齊賢弘道初為侍中
自祥道至從一劉氏凡二相

張獻甫為邠寧節度使獻甫守珪之姪也父守琦左
武衛將軍贈戶部尚書守珪子獻誠守珪之弟守瑜
二子獻恭並為山南西道節度使

杜佑為司徒諸子咸居朝列當時貴盛無比
韓弘為司途中書令元和十五年為河中節度時弘
弟克為鄭滑節度弘子公武為鄜坊節度父子兄弟

皆秉節鉞人臣之寵冠絕一時

李愬父晟平朱泚克復宮闈而不改肆洎愬平淮寇復踵其美父子仍建大勳其兄弟數人雖有功業不侔而皆領旄鉞近古罕比焉

田弘正爲魏博節度使弘正每懼有一旦之憂嗣襲之風不革兄弟子姪悉仕於朝憲宗皆擢居班列朱紫盈庭當時榮之弘正移統鎮冀又詔子布爲河陽三城懷州節度父子皆領節制時韓弘亦與子公武俱爲節度使然人以忠勤多出氏

薛平以司徒致仕卒曾祖仁貴高宗朝名將封平陽

郡公祖楚玉爲范陽平盧節度使父嵩爲昭義節度

使代宗優寵方鎮平年十二已爲磁州刺史

崔鄩爲左金吾大將軍開成初卒贈禮部尚書魯昆

第六人仕宦皆至三品弟鄴鄆三人知貢舉掌銓衡

孔緯自元和後昆仲貴盛至正卿方鎮者六七八人未

有爲宰輔者至緯始在鼎司子崇弼亦登進士第後

唐天成中自吏部郎中授給事中時族兄弟昭序由

給事中改左散騎管侍兄弟同居東省時論榮之

後唐劉岳八代祖民部尚書渝國公政會武德時功

臣祖符蔡州刺史父珪洪洞縣令符有子八人皆登

進士第珪之母翁瓌璋異母弟崇夷崇望崇魯崇暮
崇龜乾寧中廣南節度使崇望乾寧中宰相崇魯崇
暮崇夷並歷朝省岳貞明初召入翰林爲學士
朱友謙爲守太師尚書令鎮河中賜姓李名繼麟同
光中以其子令德爲遂州節度令錫爲許州節度一
門三鎮諸子爲刺史者六七人將較部符者又五六
人恩寵之盛時無與比纔勝衣者咸錫之王爵一門
之盛近古莫之儔也

歸藹字文彥吳郡人也曾祖登祖融父仁澤位皆至
列曹尚書觀察使藹同光初爲尚書右丞遷刑戶二
侍郎以太子賓客致仕

晉鄭韜光字龍符西京河清人也曾祖細爲唐相祖
祗德國子祭酒贈太傅父穎河南尹贈太師其先世
居滎陽自隋唐三百餘年公卿輔相蟬聯一門韜光
唐宣宗之外孫萬壽公主之子也生三日賜一子出
身銀章朱紱及長美容止神爽清徹不妄喜怒秉執
名節爲宗族所稱

周蕭愿爲太子賓客愿梁昭明太子後宋公瑀太師
嵩其祖也父項梁貞明年爲相唐明宗朝終太子少
保項之父廩事僖宗歷給事中京兆尹廩之先日傲

懿宗之輔相也世有令名一門七相

盧文紀以司空致仕文紀曾祖綸生四子曰簡能簡
辭簡求弘正皆至達官簡求歷邠寧太原節度以才
畧知名四授藩鎮皆為邊仕

安審暉以太子太師致仕卒贈侍中今襄帥陳王審
琦邠州副使審韜鄆州副使審玉前太原西宮使審
寓延州行軍司馬審卿供奉官審霸皆審暉之弟也
將門之盛近代罕儔

孫方諫為定國軍節度使方諫漢乾祐中累官至使
相太祖受命加侍中未幾入朝改華州節度朝廷以
其弟行友為定州留後又以弟議為德州刺史兄弟
子姪職內廷者凡數人

冊府元龜 貴盛

卷之六

冊府元龜

冊府元龜

淮南李嗣京叅閱

西極文翔鳳訂正

豫章黃國琦較釋

總錄部

內舉

自知

內舉

夫舉不避親儒者之至行立不為比君子之格言蓋
竭忠於公家非專私於我族惟善所在何嘗之有若
乃挺生令嗣旁及支庶同氣昭乎競爽卑屬彰於燕

冊府元龜 總錄部

卷之六

翼繇是發於言薦列諸奏牘用副清問以塞嘉招紹

光世濟之美克膺寵任之大至乃施及外姻義敦協

比克副所舉固匪過言斯並可尚也已

祁奚為晉大夫請老老致仕晉侯問嗣焉嗣續其職者稱解

狐其讐也將立之而卒解狐卒又問焉對曰午也可午

於是羊舌職死矣晉侯曰孰可以代之對曰赤也赤職之子伯革

於是使祁午為中軍尉羊舌赤佐之各代其父

君子謂祁奚於是能舉善矣稱其讐不為諂立其子

不為比舉其偏不為黨諂媚也偏屬也尚書曰無偏無黨王

道蕩蕩尚書洪範也蕩蕩平正無私其祁奚之謂矣

魏舒為晉大夫獻子也謂賈辛有力於王室已為祁大

夫以魏戊為梗陽大夫戊魏舒庶子魏子謂成鱣鱣晉大夫我

與戊也縣人其以我為黨乎對曰何也戊之為人也

遠不忘君遠流也近不偪同不偪同位居利思義不苟得在約

思純無濫心有守心而無淫行雖與之縣不亦可乎昔

武王克商光有天下光大也其兄弟之國者十有五人

姬姓之國者四十人皆舉親也夫舉無他惟善所在

親疏一也詩曰惟此文王帝度其心莫其德音其德

克明克明克類克長克君王此大邦克順克比比於

文王其德靡悔既受帝祉施於孫子詩大雅美文王能王大國受大

福施其子孫心能制義日度帝度德正應和日莫莫然昭

臨四方日明勤施無私日類施而無私物得其所無失類也教誨不

倦日長教誨長賞慶刑威日君作威作福慈和徧服

日順唯順故天擇善而從之日比比方善事經緯天

地日文經緯相錯九德不愆作事無悔九德上九事也皆無愆過

則動無悔吝故襲天祿子孫賴之襲受王之舉也近文德

矣所及其遠哉舉魏戊等勤施無私心其西人者裨善而從故日近文德所及遠也賈

辛將適其縣見於魏子魏子曰今女有力於王室吾

是以舉女因賈辛有功而彼舉行乎敬之哉毋墮乃

力墮損仲尼聞魏子之舉也以爲義日近不失親謂

遠不失舉以賢可謂義矣又聞其命賈辛也以爲

忠先賈王室之功故爲忠詩曰永言配命自求多福忠也詩大雅永

命長也言能長配天魏子之舉也義其命也忠其長有

後於晉國乎

漢王鳳成帝時爲大將軍輔政凡十一歲陽朔三年

秋鳳疾天子數自臨問親執其手涕泣曰將軍病如

有不可言平阿侯譚鳳庶弟也次將軍矣不可言謂死也不欲斥言之

鳳頓首泣曰譚等雖與臣至親行皆奢僭無以率導

百姓不如御史大夫音謹敕敕整也音鳳臣敢以死

保之及鳳且死上疏謝帝復固薦音自代言譚等五

人必不可用譚度弟商成都侯立紅陽侯根曲陽侯逢時高平侯天子然之初

譚倨不肯事鳳倨慢也而音敬鳳卑恭如子故薦之

後漢耿純為高陽侯初從光武攻王郎墮馬折臂時

疾發乃還詣懷宮懷宮河內縣名有離宮焉帝問卿兄弟誰可使

者純舉從弟植於是使植將純營純猶以前將軍從

晉周浚武帝時為侍中帝問浚卿宗後生稱誰為可

答曰臣叔父子恢稱重臣宗從父子馥稱清臣宗帝

並召用

王導元帝初為丞相導從弟稜少歷清官渡江為帝

丞相從事中郎導以稜有政事宜守大郡乃出為豫

章太守

郗鑒明帝時為太尉既寢疾上疏曰臣亡兄息晉陵

內史邁謙愛養士甚為流亡所宗又是臣門戶子弟

堪任兖州刺史公家之事知無不為是以敢希祗奚

之舉

謝安孝武時為侍中都督揚豫徐兖青五州幽州之

燕國諸軍事假節時符堅彊盛疆場多虞諸將敗退

朝廷求文武良將可以鎮禦北方者安乃以兄子玄

應舉中書侍郎超雖素與玄不善聞之而嘆曰安違

眾舉親明也玄應機征討所在尅捷

祖冲爲車騎將軍荊州刺史苻堅遣慕容垂毛當寇
鄧城苻熙石越寇新野冲旣憚堅衆又以疾疫還鎮
上明表以夏口江沔衝要密邇疆寇兄子石明堪居
此任輒版督荆江十郡軍事振武將軍襄城太守
温嶠字太真元帝初鎮江左嶠爲司空劉琨右司馬
及琨爲并州都督琨爲段疋碑所害從事中郎盧諶
等率餘衆奉其子羣依段末波嶠前後表稱姨弟劉
羣肉弟崔悅盧諶等皆在未波中翹首南望愚謂此
等並有文思於人之中少可愍惜如蒙錄召繼絕興
亡則陛下更生之思亘古無二

宋王誕字茂世從弟惠恬靜不交游高祖聞其名以
問誕誕曰惠後來秀令鄙宗之美也卽以爲行太尉
參軍事

王敬弘太祖初卽位爲左僕射先是從弟弘之解職
同行家在會稽上虞時敬弘爲吏部尙書奏徵弘之
爲庶子不就及敬弘爲左僕射又陳弘之高行表於
初業苦節彰於暮年今內外晏然當修太平之化宜
招空谷以敦冲退之美又徵爲通直散騎嘗侍不就
柳元景孝武大明中爲尙書令弟子世隆幼挺然自
立不與衆同雖門勢子弟獨修布衣之業長好讀書

折節涉獵文史元景獨賞愛之異於諸子言於帝得
召見帝曰此兒將來復是三公一人

南齊紀僧真明帝時爲游擊將軍兼司農帝欲令僧
真治郡僧真啓進其弟僧猛爲鍾蠡護軍晉熙太守
梁長沙宣武王懿初仕齊明帝時明帝作相內外多
虞就懿求諸弟有可委以心腹者懿言恢焉明帝以
恢爲寧遠將軍甲仗百人衛東府且引爲驃騎法曹
行參軍

周捨外弟徐摛爲左衛司馬會晉安王綱出戍石頭
高祖謂捨曰爲我求一人文學俱長兼有行者欲令
與晉安游處捨曰臣外弟徐摛形質陋小若不勝衣
而堪此選高祖曰必有仲宣之才亦不簡其容貌以
摛爲侍讀

庾詠爲都官尚書有族弟沙彌爲臨川王國中軍田
曹行參軍摛母劉氏寢疾沙彌侍側衣不解帶及母
亾水漿不入口終喪不解衰經詠表言其狀應純孝
之舉高祖召見嘉之以補歛令

後魏李順爲四部尚書從弟孝伯美風儀動有法度
順言之於太武徵爲中散郎武帝見而異之謂曰真
卿家千里駒也

高允文成時為祕書監加左將軍孝文即位叅決大政允族孫聰涉獵經史頗有文才允嘉之數稱其美言之朝廷云青州蔣少遊與從孫僧智聰字僧智雖為孤弱然皆有文情繇是與少遊同拜中書博士

房堅字千秋為司空諮議齊州大中正孝文臨軒令諸州中正各舉所知千秋與幽州中正陽尼各舉其子孝文曰昔有一祁名垂往史今有二奚當聞來牒後周杜攢仕西魏出帝為黃門侍郎兼度支尚書衛大將軍西道行臺尚帝妹新豐公主攢族子杲學涉經史有當世才畧攢清真有識鑒深器重之嘗曰吾

家千里駒也因薦之於朝廷永熙三年起家奉朝請勸讓拜邠州刺史讓從弟綽少好學博覽羣書猶善美術太祖餞讓於東都門外臨別謂讓曰卿家子弟之中誰可任用者讓因薦綽太祖乃召為行臺郎唐狄仁傑為內史子光嗣則天聖曆初為司府丞則天令宰相各舉尚書郎一人仁傑乃薦光嗣拜地官員外郎莅事稱職則天喜而言曰祁奚內舉果得其人

蔣將明德宗朝為國子司業集賢學士子又弱冠該博羣籍將明在集賢日嘗以兵亂之後圖籍溷雜乃

白執政請令入院編次於是宰相張鑑署又爲集
賢編錄纔逾一年於散亂中整緝二萬餘卷勒成部
秩
韋賢之順宗永貞中除監察御史上書舉季弟纁自
代時議不以爲私轉右補闕而纁竟代爲監察御史
漢蘓悅逢吉父也悅爲高祖從事甚見禮遇因從容
薦逢吉曰老夫髦矣才器無取男逢吉粗學援毫性
復恭恪如公不以狎犬之微願令事左右高祖召見
以精神爽聰甚憐之有頃擢爲賓佐

自知

自知者明旣標於前訓不能則止亦著於格言錄審
已以惟艱爰修身而有待是以度德以處義量能而
受任或不居於作者或竊比於前人旣行之不疑亦
事必有立蓋達識之共貫諒通人之攸許儻語吾誰
不若則近於自矜如日人各有能尚存乎揣分是故
上則成天下之務次則敦自牧之風至於奮庸鮮有
敗事斯所謂自知之難也

范獻子名鞅晉大夫也獻子曰鞅也居處恭不敢安
易敬學而好仁和於政而好其道謀於衆不以賈好
賈和志雖衆不敢謂是也必長者之繇宣子曰庶可
求

以免耳

孔子曰吾十有五而志於學三十而立

有所成立

四十而

不惑

不疑惑

五十而知天命

知天命之始終

六十而耳順

直聞其言

而知其微旨

七十而從心所欲不踰矩

矩法也從心所欲無餘法

又曰

十室之邑必有忠信如丘者焉不如丘之好學也又

曰加我數年五十以學易可以無大過矣

易窮理盡性以至於

命年五十而知天命以知天命之年讀至命之書故可以無大過矣

又葉公問孔子於

子路子路不對

葉公名諸梁葉大夫食采於葉僭稱公不對者未知所以答

子曰

女奚不曰其為人也發憤忘食樂以忘憂不知老之

將至云爾又曰若聖與仁則吾豈敢抑為之不厭誨

人不倦則可謂云爾已矣又曰苟有用我者期月而

已可也三年有成

端木賜字子貢衛人孔子問曰汝與回也孰愈

愈猶勝也

對曰賜也何敢望回回也聞一以知十賜也聞一以

知二又叔孫武叔語大夫於朝曰子貢賢於仲尼子

服景伯以告子貢子貢曰譬之宮牆賜之牆也及肩

窺見室家之好

漆雕開孔子弟子孔子使開仕對曰吾斯之未能信

開弟子漆雕姓開名仕進之道未能信者未能究者

子說

善其志道深

孟子曰宰我子貢善為說辭冉牛閔子騫顏淵善言

德行孔子兼之曰我於辭命則不能也

言人各有能我於辭言命

教則不能如二子

公孫丑曰然則夫子既聖矣乎

丑見孔子但言不能

辭命不言不能德行謂孟子欲自此孔子故曰夫子既已聖矣

曰惡是何言也昔者

子貢問於孔子曰夫子聖矣乎孔子曰聖則吾不能

我學不厭而教不倦也子貢曰學不厭智也教不倦

仁也仁且智夫子既聖矣夫聖孔子不居是何言也

繇于為楚大夫城麋

於麋築城

復命子西問高原弗知子

西曰不能如辭

言自知不能當辭勿行

對曰固辭不能子使于

也人各有能王遇盜於雲中于受其戈此于所能也

脾洩之事于亦不能也

初吳入郢昭王隨涉睢濟江入於雲中王寢盜攻之以戈

擊王繇于以背受之中肩王奔鄭繇于徐蘇而從王之在隨也子西恐國人潰散為王輿服以國于脾洩聞王所在而後從也

孫叔敖者楚之處士也三得相而不喜知其材自得

至也三去相而不悔知非已之罪也

漢曹參為齊相國及蕭何薨參聞之告舍人趣治行

舍人私屬乃王家事者趣音促速也治行謂修有治裝也

吾且入相居無何使者

果召參

趙廣漢為京兆尹先是雋不疑為京兆尹京師紀之

故廣漢言我禁姦止邪行於吏民至於朝廷事不及

不疑遠甚

後漢杜篤郡爲文學掾以目疾二十餘年不窺京師篤之外高祖破羗將軍辛武賢以武畧稱篤嘗歎曰杜氏文明善政而篤不任爲吏辛氏秉義經武而篤又怯於事外內五世至篤衰矣

楊秉爲太尉性不飲酒又早喪夫人遂不復娶所在以淳白稱嘗從容言曰我有三不惑酒色財也

魏杜畿京兆人少有大志京兆尹張時河東人也與畿有舊署爲功曹嘗嫌其濶達不助留意於諸事言此家疏誕不中功曹也畿竊云不中功曹中河東太守也後卒爲河東太守

蜀諸葛亮居隆中躬耕身長八尺每自比於管仲樂毅時人莫之許也惟博陵崔州平潁川徐庶與亮友善謂爲信然後至丞相

龐統字士元顧邵來就統宿因問統卿名知人吾與卿孰愈統曰問治世俗甄綜人物吾不及卿論帝王之秘策攬術仗之要最吾似有一日之長邵安其言而親之位至軍師中郎將

董允代費禕爲尚書令禕以朝晡聽事其間接納賓客飲食嬉戲加之博奕每盡人之懽事亦不廢允欲敬禕之所行旬日之中事多愆滯允乃嘆曰人才力

相懸若此甚遠此非吾之所及也聽事終日猶有不暇爾

晉何邵爲司徒優游自足不貪權勢嘗語鄉人王銓曰僕雖名位過幸少無可書之事惟與夏侯長容諫授博士可傳史冊耳

胡威爲徐州刺史入朝武帝語及平生因歎其父清謂威曰卿清孰與父清威對曰臣不如也帝曰何爲不如對曰臣父清恐人知臣清恐人不知是臣不如者遠也

山濤少家貧謂妻韓氏曰忍寒苦我後當作三公但不知卿堪作夫人不耳後濤果至司徒

袁甫嘗詣中領軍何勗自言能爲劇縣勗曰惟欲宰縣不爲臺閣職何也甫曰人各有能譬繒中之好莫過錦錦不可以爲帽穀中之美莫過稻稻不可以爲蓋是以聖王使人必先以器苟非周材何能悉長黃霸馳名於州郡而息譽於京邑廷尉之材不爲三公自昔然也勗善之除松滋令

謝鯤爲王敦大將軍長史嘗使至都明帝在東宮見之甚相親問曰論者以君方庾亮自謂何如答曰端委廟堂使百僚準則鯤不如亮一丘一壑自謂過之

張賓字孟孫少好學博涉經史不爲章句濶達有大節嘗謂昆弟曰吾自言智美鑒識不後子房但不遇高祖耳後爲石勒所用謂之右侯

陸玩爲司空旣拜有人詣之索盃酒瀉置柱梁之間咒曰當今乏材以爾爲柱石莫傾人梁棟耶玩笑曰感卿良箴旣而嘆息謂客曰以我爲三公是天下爲無人談者以爲知言

宋褚炫司徒淵之從弟少清簡淵嘗謂人曰從弟廉勝獨立乃十倍於我也後至散騎嘗侍

袁粲爲中書監司徒侍中初粲孝武大明中與蕭惠

開周朗同車行逢大柝惠開駐車共語惠開取鏡自照曰無年可仕朗執鏡良久曰視死如歸粲最後曰當至三公而不終也

後魏韋瑒爲荊州刺史與尚書盧淵征赭陽爲齊將垣歷生蔡道恭所敗免歸鄉里臨別謂淵曰主上聖明志吞吳會用兵機要在於上流若有事荆楚恐老夫復不得停耳後車駕征楚復起瑒爲中軍大將軍彭城王總長史

溫子昇爲中書郎嘗詣梁使館受國書自以不修容止請人曰詩章易作通峭難爲大將軍高澄客元

元

也史失其名 曰諸人當賀推子昇合陳辭子昇久怙怩乃推陸操焉

北齊薛琡字曇珎形貌魁偉少以幹用仕魏稱為典客令每引客見儀望甚美魏帝召而謂之曰卿風度峻整姿貌秀異後當升進以處何官琡曰宗廟之禮不敢不敬朝廷之事不敢不忠自此以外非庸臣所及

唐屈突通為陝東大行臺右僕射鎮於雒陽數歲徵拜刑部尚書通自以不習文法固辭之轉工部尚書盧懷慎玄宗開元三年遷黃門監懷慎與紫微令姚

崇對掌樞密懷慎自以為吏道不及崇每事皆推讓之

李夷簡為門下侍郎平章事時裴度當國柄李師道未平度方以兵機為任夷簡自揣敷奏之辯細畧之才不能踰度未數日復求出鎮遂拜簡較左僕射平章事充淮南節度使

李勣為淮南節度使徵拜門下侍郎平章事勣雖出入顯重素不以公輔自許年侵勢過頗安外鎮登祖筵聞樂而泣且曰宰相之任非吾所長也行頗緩至京師又辭疾歸第既謁亦不領政事上章以疾辭罷

為戶部尚書

鄭綮為詩多侮劇刺時號鄭五歇後體累官散騎嘗
侍昭宗見其詩什激許謂有蘊蓄就班簿側注云鄭
綮可禮部侍郎平章事申書胥吏詣其家叅謁綮笑
而謂之曰諸君大誤俾天下人並不識字宰相不及
鄭五也制下親賓來賀搔首言曰歇後鄭五作宰相
時事可知矣終以物望非宜自求引退

後唐崔沂唐宰相玄之幼子昭宗時累遷至員外郎
知制誥惟執厲守道而文彩非所長嘗與同舍顏蕘
錢翊俱秉筆見蕘翊瞻速草制數十如飛無妨談笑
而沂从未成文頗自愧翌日謁國相新口沂疎淺不
足供詞翰之職守官則敢不策厲以報掄選相輔然
之移為諫議

晉薛融高祖天福三年自左諫議大夫遷中書舍人
自以文學非優不敢拜命復為諫議

白以文公非對不效兼命發為精結
晉籍編高臥天麻三羊自志精講大夫夢中書舍人
之終益精結
又於歸歸之鄉守官限道不黃孤以游餘遊卧神然
而代入未及文融自勉聖日隨隨以清口元氣亦不

冊府元龜

淮南李嗣宗參閱

西極文翔鳳訂正

豫章黃國琦較釋

總錄部 一百一十八

遊宴

餞別

好客

遊宴

夫有負藉甚之才抱夷曠之性居軒冕之貴不以嬰
懷顧簿領之繁嘗多暇日或締交接坐或羣從侍遊
偶四序之良辰為一時之勝賞吹臺琴室月觀風亭

宴衍乎園池放情於丘壑清心雅致名教存焉

楚公子圍為令尹魯昭公元年諸侯盟於號公子圍

享趙孟賦大明之首章

大明詩大雅首章言文王明明昭於下故能赫赫盛於上

令尹意在首章故特稱首章以自光大

趙孟賦小苑之二章

小苑詩小雅二章取

其各敬爾儀天命不又言天命一去不可復還以戒令尹

晉山簡為征南將軍都督荆湘交廣四州諸軍事簡

優游卒歲惟酒是耽諸習氏荆土豪族有佳園池簡

每出嬉游多之池上置酒輒醉名之曰高陽池

羊祜為征南大將軍樂山水每風景必造峴山置酒

言詠嘗謂從事中郎鄒湛等曰自有宇宙便有此山

出來賢達勝士登此遠望如我與卿者多矣

謝安初辟司徒府除佐著作郎並以疾辭寓居會稽

與王羲之及高陽許詢桑門支遁游處出則漁弋山

水入則言詠屬文雖放情丘壑然每游賞必以妓女

從游後為太保進督楊江荆司十五州軍事於土山

營墅樓館林竹甚盛每携中外子姪往來游集肴饌

亦屢費百金

王羲之為會稽內史去官居會稽嘗與同志宴集於

會稽山陰之蘭亭羲之自為之序以申其志或以潘

岳金谷詩序方其文羲之比於石崇聞而甚喜

孟嘉爲征西桓溫參軍溫甚重之九月九日溫燕龍山寮佐畢集時佐吏並著戎服有風至吹嘉帽墜落嘉不之覺溫使左右勿言欲觀其舉止嘉未久如廁溫令取還之命孫盛作文嘲嘉著坐處嘉還見卽答之其文甚美四座嗟歎

宋徐湛之爲南兗州刺史善於爲政威惠並行廣陵城舊有高樓湛之更加修整南望鍾山城北有陂澤水物豐盛湛之更起風亭月觀吹臺琴室果竹繁茂花藥成行招集文士盡游玩之適一時之盛也

謝混字叔源歷中書令領軍尚書左僕射風格高峻

少所交納惟與族子靈運瞻晦曜弘微並以文義賞會嘗共宴處居在烏衣巷故謂之烏衣之游混五言詩所云昔爲烏衣遊戚戚皆親姪者也其外雖後高流時譽莫敢造門

梁羊侃爲大軍司高祖大同中魏使陽裴與侃在北嘗同學有詔令侃延裴同宴賓客三百餘人食器皆金玉雜寶奏三部女樂至夕侃不飲酒而好賓客交遊終日獻酬同其醉醒

蕭介字茂鏡釋褐著作佐郎性高簡少交游惟與族兄琛從兄朏素及洽從弟淑等文酒賞會時人以比

謝氏烏衣之遊

任昉爲御史中丞簪裾輻湊預共宴者殷芸到溉劉苞劉孺劉顯劉孝綽及陸倕而已號曰龍門之游雖貴公子孫不得預也

陳孫瑒授散騎嘗侍出鎮郢州乃合十餘船爲大舫於中立亭池植荷芰每良辰美景賓僚並集泛長江而置酒亦一時之勝賞焉

徐伯陽爲侯安都司空叅軍宣帝大建初與中記室李爽記室張正見尚書郎賀徹學士阮卓黃門蕭銓三公郎王自禮處士馬樞記室祖登比部賀循長史

劉刪等爲文會之友後有蔡凝劉助陳暄孔範亦預焉皆一時之士也游宴賦詩勒成卷軸伯陽爲其集序盛傳於世

後魏梁祐爲太中大夫從容風雅好爲詩詠嘗與朝廷名賢泛舟維水以詩酒自娛

唐楊師道爲侍中退朝後必引當時英俊宴集園池而文會之盛當時莫比

郭子儀鎮河中代宗大曆二年二月子儀入朝宰臣元載王縉及左僕射裴冕戶部侍郎判度支第五琦京兆尹劉幹共出錢三十萬宴子儀於其私第內侍

魚朝恩奏其會焉朝恩出錦二十疋綵羅五十疋綵綾一百疋爲子儀纏頭之費極歡而罷

杜佑爲司徒置第於安仁里及城南創別墅日公卿宴游廣陳妓樂

杜式方佑之子也以蔭授揚府參軍入爲太嘗寺王簿父作鎡揚州家財鉅萬甲第安仁里杜城有別墅亭館林池爲城南之最昆仲皆在朝廷與時賢游從樂而有節

元稹爲越州刺史浙東觀察使會稽佳山水稹所辟幕職皆當時文士而鏡湖秦望之游月三四焉而諷

詠詩什動盈卷裴副使竇鞏海內詩名與稹酬唱最多至今稱蘭亭絕唱

晉盧詹高祖天福初拜禮部尚書分司維下與右僕射盧質散騎嘗侍盧重俱在西都數相過從三人俱嗜酒好游山水塔廟林亭花竹之地無不同往酣飲爲樂人無間然維中朝士目爲三盧會

餞別

夫祖離送別必在於有情登山臨水實生於遠思若乃膺受封之寵持式玉之命成師以出上受而歸則有都邑盡傾車蓋千乘賦詩以見志贈言以表誠簡

册已來風流相接其或懷去國之戚有永訣之懼莫不慷慨悲歎留連燕胥自非達者豈能忘情於此際者哉

周顯父餞送韓侯故大雅韓奕之詩曰韓侯出祖出宿於屠顯父餞之清酒百壺

屠地名也顯父有顯德者也祖將去而餞之也

既覲而反國必祖者尊其所往去則始行馬祖於國外畢乃出宿示行不留於是也其餽維何

魚鼈鮮魚其餽維何維筍及蒲其贈維何乘馬路車

魚鼈以火熟之鮮魚中鱸者也筍竹萌也蒲深蒲也

贈送也王既使顯父餞之使送以車馬所以贈厚意也人君之車曰路車

所以駕之馬曰乘馬遂豆有且侯氏燕胥

且多也胥相也諸侯

相在宗廟未去者顯父餞之時皆來用其禮其禮豆且然祭具多也

伍舉為楚大夫自楚奔鄭將遂奔晉聲子將如晉遇

之於鄭郊班荆相與食而言如故

班布也布荆聲也其議歸楚事

子曰子行也吾必復子

韓起為晉大夫聘於鄭六卿餞宣子於郊

餞送行飲酒

子曰二三君子請皆賦起亦以知鄭志

詩言志也

野有蔓草

子齧子皮之子嬰齊也野有蔓草鄭風取其邂逅相遇適我願兮

孺子善哉吾有望矣

君子相願也

別於唐羔裘也取其彼已之子

宣子曰起不堪也

子太叔賦褰裳

褰裳詩曰子惠思我褰裳涉溱子不我思豈無他人言宣子思已將

有褰裳之志如不我思而豈無他人

宣子曰起在此敢勤子至於他人

總錄部

乎言已崇好在此不復令了他人子太叔拜謝宣子之有鄭宣子曰善哉

子之言是是褻不有是事其能終乎韓起不欲令鄭求他人子太叔

拜以答之所子游賦風雨子游駟帝之子駟偃也風雨詩取其既見君子云胡

不夷子旗賦有女同車子旗公孫段之子豐施也有女同車取其洵美且都愛樂宣子

志之子柳賦稇兮子柳印段之子印祭也稇兮詩取其倡予和女言宣子倡已將和從之

宣子喜曰鄭其庶乎庶幾二三君子以君命貺起賦

不出鄭志六詩皆鄭風故皆昵燕好也昵親也賦不出其國以示

好親二三君子數世之主也可以無懼矣宣子皆獻馬

焉而賦我將我將詩頌取其日靖四方我其夙夜

產拜使五卿皆拜曰吾子靖亂敢不拜德

荆軻衛人初燕太子丹質於秦秦王遇丹不善故丹

怨而亡歸因結交於荆軻為報秦王太子及賓客送

之至易水之上既祖取道高漸離擊筑荆軻和而歌

為變徵之聲士皆垂淚滄泣又前而為歌曰風蕭蕭

兮易水寒壯士一去兮不復還復為羽聲慷慨士皆

瞋目髮盡上指冠於是荆軻就車而去

漢東郭先生武帝時久待詔公車貧困及其拜為二

千石佩青緇音爪一音出宮門行謝主人故所以同

官待詔者等比祖道於都門外榮華道路立名當世

東郭先生也此所謂衣褐懷寶者也

李廣利為貳師將軍擊匈奴丞相劉屈氂為祖道送渭橋與廣利別

疏廣東海蘭陵人也宣帝時為太子太傅兄子受為少傅在位五歲乃與受移病滿三月賜告廣遂稱篤上疏乞骸骨帝以其年篤老皆許之公卿大夫故人邑子設祖道供帳東都門外送者車數百兩辭決而去及道路觀者皆曰賢哉二大夫或歎息為之下泣後漢陳遵為大司馬更始時使匈奴過辭於王丹丹曰俱遭反覆惟我二人為天所遺今子當之絕域無以相贈贈子以不拜遂揖而別遵甚悅之

高彪為中郎較書東觀時京兆第五永為督軍御史使督幽州百官大會祖餞於長樂觀議郎蔡邕等皆賦詩彪乃獨作箴曰文武將墜乃俾俊臣整我皇綱董此不虔古之君子即戎忘身明其果毅上其桓桓呂尚七十氣冠三軍詩人作歌如薦如鵠天有太乙五將三門地有九變丘陵山川人有計策六奇五間總茲三事謀則諮詢無日已能務在求賢淮陰之勇廣野是尊周公大聖石碣純臣以威克愛以義滅親勿謂時險不正其身勿謂無人莫識已真忘富遺貴福祿乃存枉道依合後無所親先公高節越可永遵

佩藏斯戒以勵終身色等甚美其文以爲莫尚也後
彪爲中郎較書於東觀及遷內黃令帝勅同僚臨送
祖於上東門

郭泰字林宗游於雒陽始見河南尹李膺大奇之遂
相友善於是名震京師後歸鄉里衣冠諸儒送至河
上車數千兩林宗惟與李膺同舟而濟衆竄望之以
爲神仙焉泰後舉有道不就

禰衡平原般人也爲曹公所怒遣人騎送之劉表臨
發衆人爲之祖道先供設於城南乃更相戒曰禰衡
恃虐無禮今因其後到咸當以不起折之也及衡至

衆人莫肯與衡坐而大號衆問其故衡曰坐者爲冢
卧者爲屍冢屍之間能不悲乎

魏管輅與諸葛原別原戒以二事言卿惟樂酒量雖
溫克然不可保寧當節之卿有冰鏡之才所見者妙
禍如膏火不可不慎持卿獻才以游於雲漢之間不
憂不富貴也輅言酒不可極才不可盡吾欲持酒以
禮持才以愚何患之有耶輅至少府丞

蜀張裔字君嗣爲丞相諸葛亮留府長史詣亮咨事
送者數百車乘盈路裔書與所親曰人自敬丞相長
史男子張君嗣附之疲倦欲死

晉賈充為車騎將軍都督秦涼二州諸軍事鎮關中將之鎮百僚餞於夕陽亭

石崇為征虜將軍假節監徐州諸軍事鎮下邳崇有別館在河陽之金谷一名梓澤送者傾都帳飲於此焉

王澄為荊州刺史將之鎮送者傾朝

溫嶠為王敦左司馬會丹陽尹缺敦表補嶠為之因敦饌別嶠起行酒至錢鳳前因為醉以手板擊鳳牘墜敦以為醉而釋之臨去言別涕泗橫流出閣復入如是再三然後即路

桓溫太和中悉眾北伐平北將軍郝愔以疾解職又以溫領平北將軍徐兗二州刺史率兗南中郎俾西中郎袁真步騎五萬北征百官皆於南州祖道都邑盡傾

殷浩為中軍將軍廢徙東陽委命談詠雖家人不見其有流放之戚甥韓伯浩素賞愛之隨至徙所經歲還都浩送至渚側詠顏曹遠詩云富貴他人合貧賤親戚離

殷仲文為桓玄諮議參軍將還姑熟送者傾朝宋何尚之字彥德為吏部郎告休定省傾朝廷送別

別於治渚及至郡父叔度謂曰聞汝來此傾朝相送可有幾客答曰殆數百人叔度笑曰此是送吏部郎耳非關何彥德也昔殷浩亦嘗作豫章定省送者甚衆及廢徙東陽船泊征虜亭積日乃至親舊無復相窺者

沈懷文為殿中郎時隱士雷次宗被徵居鍾山後南還盧岳何尚之設祖道文義之士畢集連句為詩懷文所作猶美

南齊張融出為封溪令從叔永出後渚送之曰似聞朝旨汝尋當還融曰不患不還正恐還而復去

梁陶弘景初仕齊為奉朝請永明十年上表辭祿詔許之賜以束帛及發公卿祖之於征虜亭供帳甚盛車馬填咽咸云宋齊已來未有朝野榮之

唐賀知章為散騎嘗侍請度為道士求還鄉里皇太子已下咸就執別哥舒翰為太子少保安祿山反以為皇太子先鋒兵馬副元帥拒賊於潼關百僚出餞於郊

好客

自戰國之世四豪競逐莫不傾意下士以致千里之客繇是方來之賓入者悅出者譽而光名滿於天下

矣漢氏之後游談滋甚乃有虛懷曲意翹思延佇孜孜以款接區區而忘勢以至門無停輪坐無空席漿酒藿肉撞鐘舞女以極其宴喜從車飛蓋名園別墅以縱乎游娛騁文翰以爲適資氣俠以自任斯固儻儻磊落夸邁流俗者之所爲也若乃羣居之談不能及義踰侈之咎見譏於時此又不足尙已

田文齊公子封爲孟嘗君在薛招致賓客及亾人有罪者皆歸孟嘗君孟嘗君舍業厚遇之以故傾天下之士食客數千人無貴賤一與文等孟嘗君待客坐語而屏風後掌侍史王記君所與客語問親戚居處

客去孟嘗君已使使存問獻遺其親戚孟嘗君曾待客夜食有一人蔽火光客怒以爲飯不等辭去孟嘗君若起自持其飯比之客慚自刎士以此多歸孟嘗君客無所擇皆善遇之人人各自以爲孟嘗君親已趙勝趙公子也封爲平原君諸子中勝最賢喜賓客賓客蓋至者數千人

信陵君無忌魏昭王少子魏安釐王異母弟也昭王薨安釐王卽位封公子爲信陵君公子爲人仁而下士士無賢不肖皆謙而禮交之不敢以其富貴驕士士以此皆方數千里爭往歸之致食客三千人當是

時諸侯以公子賢多客不敢加兵謀魏

春申君黃歇為楚相時是時齊有孟嘗君趙有平原

君魏有信陵君方爭下士招致賓客以相傾奪輔國

持權當是時楚復強趙平原君使人於春申君春申

君舍之上舍趙使欲誇楚為玳瑁簪刀劍室以珠玉

飾之請命春申君客春申君客三千餘人其上客皆

躡珠履以見趙使大慙

呂不韋為秦相國是時魏有信陵君楚有春申君趙

有平原君齊有孟嘗君皆下士喜賓客以相傾不韋

亦招致士厚遇之至食客三千人

漢陳豨為列侯以趙相國將監趙代邊豨少時慕魏

公子及守邊招致賓客嘗告歸過趙因沐浴之賓客

隨之者千餘乘邯鄲客舍皆滿豨所以待賓客如布

衣交皆出客下

鄭當時孝景時為太子舍人每五日洗沐嘗置驛馬

長安諸郊邑外謂之郊請謝賓客夜以繼日至明日

嘗恐不徧後為大司農當時為大吏戒門下客至無

貴賤無留門者執賓主之禮以其貴下人

陳遵為較尉擊賊趙朋霍鴻有功封嘉威侯居長安

中牧守當之官及郡國豪傑至京師者莫不相因到

遵門嗜酒每大飲賓客滿堂輒關門取客車轄投之井中雖有急終不得去

後漢崔瑗為濟北相愛士好賓客盛修肴饌殫極滋味或言其大奢瑗聞之怒敕妻子曰吾弁日而食以供賓客而反以獲譏士大夫不足養如此後勿過菜具無為諸子唐蚩也終不能改奉祿盡以賓享也來豔少好學下士開館養徒位至司空

皇甫嵩折節下士門無留客言汲引之速時人皆稱而附之嵩至太嘗

袁紹有姿貌威容愛士養客英雄紀曰紹不妄通賓客非海內知名不得相

見又好游俠與張孟卓何伯求吳子卿許子遠皆為奔走之友既累世台司賓客所

歸加傾心折節莫不爭赴其庭士無貴賤與之抗禮輜輶柴轂填接街陌內官皆惡之自袁安已下皆博愛容衆無所揀擇賓客入其門無賢愚皆得所欲為天下所歸官至太尉大將軍

孔融為大中大夫容衆少忌好士喜誘掖後進及退閒職大中大夫職在言議故為閒職賓客日盈其門嘗歎曰坐上客嘗滿罇中酒不空吾無憂矣

魏曹純敬愛學士學士多歸焉繇是為遠近所稱年十八為黃門侍郎

吳諸葛融瑾次子也瑾卒融襲爵攝兵業駐公安秋冬則射獵講武春夏則延賓交會休吏假卒或不遠千里而造焉每會輒歷問賓客各言其能乃合榻促席量敵選對或有博奕或有樗蒲投壺弓彈部別類分於是甘果繼進清酒徐行融周流觀覽終日不倦後爲奮威將軍

顧邵字孝則好樂人倫自州郡庶職及四方人士往來相見或言議而去或結厚而別風聲流聞遠近稱之權妻以策女年二十七起家爲豫章太守

晉陶侃爲荊州刺史未嘗壅滯接引疎遠門無停客

宋劉穆之初爲高祖軍府主簿愛好賓游坐客嘗滿性奢豪食必方丈且輒爲十人饌穆之旣好賓客未嘗獨殮每至食時客止十人已還者依嘗下食以此爲嘗白高祖曰穆之家本貧賤膳生多缺自叨忝以來每存約損而朝夕所須微有過豐自此以外一毫不以負公

蔡邕南陽冠軍人也家素富而邕兄局善接待賓客至無多少皆資給之嘗爲郡縣所優異蠲其調役南齊王寂字子玄侍中僧虔之子性迅動好文章王融之敗後賓客多歸之位至祕書郎卒

梁任昉爲御史中丞好交結獎進士友得其延譽者率多升權故衣冠貴游莫不爭與交好坐上賓客恒有數十時人慕之號曰任君言如漢之三君也

庾夔少聰慧家富於財好賓客食必列鼎卒於家羊侃爲都官尚書性不飲酒而好賓客交游終日獻酬同其醉醒

陳魯廣達吳州刺史悉達弟也虛心愛士賓客多自遠而至終於中領軍

孫瑒爲石軍將軍其自居處頗失於奢豪庭院穿築極林泉之致歌鐘舞女當世罕儔賓客旗門軒蓋不

絕

後魏源懷爲車騎大將軍性不飲酒而喜以酒飲人好接賓友子雍字靈和推誠待士士多歸之

鄭伯猷爲太學博士領殿中御史與當時名勝咸申游款

夏侯道遷豫州刺史頗表解州於京城之西水次市地大起園池殖列蔬果延致秀彥時往游適妓妾十餘嘗自娛樂國秩歲入三千餘疋專供酒饌不營家產每誦孔融詩日坐上客嘗滿樽中酒不空餘非吾事也識者多之

馮元興家素貧約食客嘗數十人同其饑飽曾無恡色時人歎尚之位至中書舍人

北齊段孝言爲侍中丞僕射雖黷貨無厭恣情酒色然舉止風流招致名士美景良辰未嘗虛棄賦詩奏妓畢盡歡洽雖草萊之士粗闕文藝多引入賓館與同興賞其貧賤者亦時有乞遺世論復以此多之

韓晉明軌之子也天統中封東萊王晉明有俠氣諸勲貴子孫中最留心學問好酒誕縱招引賓客一席之費動至萬錢猶恨儉率朝廷欲處之貴要地必以疾辭告人曰廢人飲美酒對名勝安能作刀筆及披

故紙乎

鄭述祖爲太子少師兗州刺史所在好爲山池松竹交植盛脩饌以待賓客將迎不倦

邢邵性好談賞不能閑獨公事歸休嘗須賓客自伴官至太嘗鄉中書監

後周司馬消難子如之子初在齊子如當朝消難亦愛賓客邢子才王元景魏收陸邛崔詹等皆遊其門仕至車騎將軍

長孫澄爲大將軍雅好賓客接引忘疲雖不飲酒而好觀人酣興嘗恐座客請歸每勅中厨別進異饌留

之

裴漢性不飲酒而雅好賓游每良辰美景必招引時
彥宴賞留連間以篇什當時人物以此重之

隋庾季才爲大中大夫志好宴游嘗吉日良辰與鄉
琊王褒彭城劉毅河東裴政及宗人信等爲文酒之
會次有劉臻明克讓柳誓之徒雖爲後進亦申游款
蕭夔少有盛名於天下引致賓客四海士大夫多歸
之官至通議大夫

楊玄感爲禮部尙書性雖驕倨而愛重文學四海知
名之士多趨其門

唐李百藥爲宗正卿好招延賓友罇酒嘗不空

唐憲武德初拜太子右虞侯率後歷散騎嘗侍雲麾
將軍銀青光祿大夫旣無他職事居多閒逸與親戚
故人酣暢以此自適焉

楊師道爲侍中退朝之後必宴集園池預在賓筵皆
屬文之士歌童舞女縱以歡娛

趙景慈天水隴西人也父訥隋番州總管景慈幼有
姿儀美風調高祖潛龍時見而悅之妻以桂楊公主
及長有文武才幹好交結座客嘗滿接對忘疲弱冠
得美名於京邑高祖於諸聳中特所親愛位至華州

刺史

李安期爲黃門侍郎好接引隱淪之士及當時名僧道士無不與之爲布衣之交焉

後唐王思同爲同州節度使未幾移鎮隴右思同好文士無賢不肖必館接賄遺數千萬

晉李從昶爲左龍武統軍性好談笑喜接賓客文翰爲賞無虛日

周和矩太子太傅凝之父性嗜酒少拘禮節雖素不知書見文士未嘗有慢色必罄家財以延接

翟光鄴家無餘財賓朋至則貫酒延之談笑終日晷

無倦厭士大夫多歸之官至宣徽使兼樞密使

